



№ 16 (931) 8-noyabr, Dushanba 2021-yil	TOSHKENT PEDIATRIYA TIBBIYOT INSTITUTI MEHNAT JAMOASI NASHRI ОРГАН ТРУДОВОГО КОЛЛЕКТИВА ТАШКЕНТСКОГО ПЕДИАТРИЧЕСКОГО МЕДИЦИНСКОГО ИНСТИТУТА	Gazeta 1974-yil martdan chiqqa boshlagan
--	---	--

## ZAMONAMIZ QAHRAMONLARI

**B. T. DAMINOV,**  
**ToshPTI rektori,**  
**Xalq deputatlari Toshkent**  
**shahar kengashi deputati**

Shifokorlar millatning eng katta boyligi va xazinasidir. Chunki bu dunyoda sog'liq o'laroq bebaho ne'mat bormi?! Vujudimizni og'riq zirqiratib tursa, ko'nglimizga nima sig'adi? Jondan yaxshi ko'rgan oilamizmi yoki hayotimizning muhim bir qismiga aylangan ishimizmi? Aslo! Ko'nglimizga hech kim va hech nima sig'maydi, sig'dirolmaymiz. Xalqimiz orasida mashhur, asrlarning elagidan o'tib kelayotgan "Sog'lik – tuman boylik" maqoli ham bejizga aytilmagan. Axir, baxtli va boy inson – sog'lom inson emasmi?! Holbuki, ko'hna dunyoning oltin gultojlari shu kungacha ne-ne kasalliklar oqimiga qarshi tabiblar, shifokorlar yordamida kurashib keldi. Shuning o'zi shifokorlar har bir davrning eng katta ehtiyoji ekanini ko'rsatib beradi.

Shu o'rinda, bugun XXI asr dunyosi ham og'ir biosiyosiy jarayonni boshdan kechirmoqda, asoratli pandemiya sharoitini yengib o'tishda shifokorlar ko'magi juda katta kuch bo'lib, beminnat xizmat qildi va qilmoqda. Koronavirus pandemiyasi butun insoniyatni o'ylantirayotgan paytda malakali shifokorlar, tajribali mutaxassislariga bo'lgan ehtiyoj ancha sezilib qoldi. Mamlakatimiz Prezidenti Shavkat Miromonovich Mirziyoyev shifokorlar ko'rsatgan

fidokorlikni 2020-yil hisobidan Oliy Majlisga va xalqimizga yo'llagan murojaatnomasida alohida ta'kidlab, o'z minnatdorchiligini bildirgan edi. Ha, har bir davrdagi kabi bugun ham ular zamonamiz qahramonlaridir.

2021-yil 1-noyabr kuni Prezidentimiz 2022-yilgi davlat budjeti muhokamasiga bag'ishlangan yig'ilishida ta'lim va tibbiyot tizimiga e'tibor qaratar ekan, o'qituvchi va shifokorlarning oyligini bosqichma-bosqich oshirishni, ushbu maqsad uchun 350 milliard so'm ajratilishini, onkogematologiya, endokrinologiya, buyrak va jigar ko'chirib o'tish dasturlari uchun 1 trillion so'm mablag' ajratilishini aytib o'tdi. Shuningdek, koronavirusga qarshi emlanganlarning sonini 17 millionga yetkazish bo'yicha topshiriq berdi.

Bugungi kunda sog'liqni saqlash tizimini yaxshilash, sohada yetuk va chuqur bilimga ega kadrlarni zamonaviy ta'lim standartlari asosida tayyorlash, tibbiyot tashkilotlari, ayniqsa, birlamchi tibbiy-sanitariya yordami muassasalarini professional mutaxassislar bilan ta'minlash, tibbiyot ta'lim muassasalari professor-o'qituvchilarining mavqeini oshirish masalalariga alohida e'tibor qaratilmoqda.

Prezidentimizning 2020-yil 12-noyabrdagi "Birlamchi tibbiy-sanitariya yordami muassasalari faoliyatiga mutlaqo yangi mexanizmlarni joriy qilish va sog'liqni saqlash tizimida olib borilayotgan islohotlar samaradorligini yanada oshirish chora-tadbirlari to'g'risida"gi farmoni bilan 4 ta viloyatdagi

oliy ta'lim muassasalarida tibbiyot yo'nalishidagi fakultetlar ochildi. Jumladan, 2021-2022-o'quv yilida tarkibida tibbiyot oliygohlari bo'lmagan Qarshi davlat universiteti, Jizzax davlat pedagogika instituti, Navoiy davlat pedagogika instituti va Guliston davlat universitetlarida tibbiyot yo'nalishidagi fakultetlar tashkil etilishi mazkur sohadagi muhim qadamlardan bo'ldi.

Umuman olganda, yurtimizda kechayotgan jadal islohotlar jarayonida tibbiyot sohasiga ham qaratilayotgan e'tibor men kabi kasbdoshlarimga ham kuch-g'ayrat, shijoat bag'ishlaydi. Mamlakatda tibbiyot bo'yicha o'tkazilayotgan, yo'lga qo'yilayotgan islohotlarning barchasi fuqarolarning salomatligini ta'minlash bilan birgalikda, shifokorlarning zimmasiga ulkan mas'uliyat yuklaganligi ham jamiyatning yutug'i. Shifokorlik kasbini butun umri davomida Gippokrat qasamiyodiga sodiq qolib bajarayotgan tibbiyot xodimlari xalq va vijdoni oldida yorug' yuz bilan tura oladi, ularning eng ulkan baxti ham shunda. Muhimi, kasbiga mas'uliyat va muhabbat bilan yondashishida. Shu o'rinda, Toshkent Pediatriya tibbiyot institutida talabalarga o'z bilimini beminnat ulashayotgan jonkuyar ustozlarimizga qanchadan-qancha rahmat aytisak arziydi. Bugungi talabalar O'zbekiston fuqarolari salomatligining ertangi posbonlaridir. Ularga ta'lim berayotgan ustozlarning, millat salomatligiga daxldor hamkasblarimizning yo'li va ertasi egnidagi libosi yanglig' nurlu bo'lishini tilab qolaman.

## JAHOLATGA QARSHI – MA'RIFAT



Ma'lumki, XXI asr axborot asri bo'lib, hozirgi davr avlodi globallashuv jarayoni shiddatli tus olgan zamonda yashamoqda. Aynan yosh avlod turli ko'rinishdagi g'oyaviy xurujlar nishoniga aylangani ham hech kimga sir emas. Bir tomondan ekstremistik ruhdagi oqimlar faoliyati, boshqa tomondan missionerlar harakati, uchinchi tomondan esa "ommaviy madaniyat" targ'ibotchilari yosh avlod ongiga sof Islom dini ta'limotiga zid aqidalarni singdirish, muqaddas e'tiqodimizdan ayirish, o'zbekona milliy va diniy qadriyatlarimizdan voz kechishga targ'ib etish bilan o'z faoliyatlarini muttasil olib bormoqdalar. Natijada, sof Islom ta'limotidan yetarli darajada ilmga ega bo'lmagan ba'zi yoshlar ekstremistik g'oyalarga chalg'ib turli xil jinoyalarga qo'l urmoqdalar, Ba'zilari ana shunday jinoyatlarning qurboniga aylanmoqdalar. Yana ba'zilari Islom dinidek ma'rifatparvar, tinchlikparvar, butun insoniyatga faqat yaxshilikni ta'lim berguvchi dinni qandaydir arzimagan dunyo matohiga almashib o'zga dinni "Din" deb qabul qilmoqda. Boshqalari esa g'arb davlatlarining moddiy taraqqiyoti go'yoki, ularning madaniyatiga asoslangandek xayol

qilib, kiyinishda, o'zini tutishda va xatto fikrlashda milliylik va diniylikka yot usullarni o'ziga ma'qul ko'rmoqda.

Bugungi kunda axborot manzarasida ro'y berayotgan chuqur o'zgarishlar, yot mafkuralar ta'siri, internet va ijtimoiy tarmoqlar orqali yoshlar e'tiborini tortyapti. Internet tarmoqlari nafaqat foydali manbalarni, balki o'zi bilan birga fikrsizlik tanazzulini ham yetakalab yuribdi. Ijtimoiy tarmoqlardagi bunday tanazzulning qurboni asosan yoshlarni tashkil etishi esa haqiqiy fojiamizdir. Biz yoshlardagi salbiy g'oyaviy ta'sirlarga nisbatan ma'naviy-mafkuraviy immunitetni yanada oshirishni vazifamiz va burchimiz deb qabul qilishimiz, shuning barobarida yoshlarimizga jaholatga qarshi ma'rifat bilan kurashishni o'rgatishimiz kerak. Shundagina ular bu jarlikka qulamaydi.

Kuni kecha Toshkent pediatriya tibbiyot institutida talaba-yoshlari, tyutorlar hamda professor-o'qituvchilar ishtirokida soha mutaxassislari bilan shu maqsadga yo'naltirilgan, ya'ni "Jaholatga qarshi – ma'rifat" shiori ostida ma'naviy-ma'rifiy targ'ibot tadbiri o'tkazildi. Tadbirda professor-o'qituvchilar hamkor tashkilot vakillari hamda 150 nafar talaba-yoshlar ishtirok etishdi.

Tadbirni Yoshlar bilan ishlash, ma'naviyat va ma'rifat bo'limi boshlig'i A.Xudayberdiyev kirish so'zi bilan ochib berdi. Shundan so'ng, mavzuga oid masalalar bo'yicha taklif etilgan soha mutaxassislari, jumladan, O'zbekiston Respublikasi Yoshlar ishlari agentligi bosh mutaxassisi E.Norpo'latov, O'zbekiston Respublikasi Ichki ishlar vazirligi mas'ul xodimi O.Yusupov, O'zbekiston Respublikasi Din ishlari bo'yicha qo'mitaning Toshkent shahar boshqarmasi mutaxassisi J.Meliqo'ziyev, Toshkent davlat yuridik universiteti dotsenti, Respublika Ma'naviyat va ma'rifat markazi eksperti, adabiyotshnos olim Qo'chqor Rahmonlarning ma'ruzalari tinglandi.

Bunday tadbirlar nafaqat yoshlar ongidagi buzilishlar oldini olishda, balki shaxsni jamiyat uchun foydali ishlarni qilishga undaydi, ayniqsa, yoshlarni yuksak ma'naviyatli, mustaqil va erkin fikrlaydigan, har tomonlama sog'lom, barkamol avlod sifatida voyaga yetkazishda ham g'oyat muhim ahamiyat kasb etadi.

Tadbir davomida yoshlarimizdagi ma'naviy-ma'rifiy bo'shliqlarni ilm-u ma'rifat bilan to'ldirish, turli tajovuzlardan himoyalash uchun avvalo, yoshlar qalbida Vatanimizga bo'lgan muhabbat va daxldorlik hissini yanada rivojlantirish, buyuk tariximizni, milliy urf-odatlarimizni yoshlar qalbiga doimiy singdirib borish zarurligi ta'kidlandi. Mamlakatimizda talaba-yoshlar uchun yaratilgan keng imkoniyatlardan oqilona foydalanish, bo'sh vaqtini mazmunli o'tkazish, qabul qilingan xuquqiy qoidalari va xavfsizlik qoidalariga amal qilishi bo'yicha ma'lumot berildi.

Shundan so'ng, talaba-yoshlarning mavzu yuzasidan bildirilgan savol va takliflari tinglandi. Mazkur savol va takliflarga tashrif buyurgan soha mutaxassislari tomonidan munosabat bildirildi va kelgusida bu kabi uchrashuvlarni muntazam o'tkazib borishga kelishib olindi.

XXI asr texnikaning, ilm-fanning cheksiz imkoniyatlari bilan birga insoniyat ma'naviyatiga jiddiy xavf soluvchi omillarni ham tuhfa etdi. Ko'rinmas tahdidlardan kelajagimizni himoyalash uchun har birimiz ma'sul va javobgar davrda yashayapmiz. Millatning, jamiyatning, shaxsning dushmani loqaydlikdir. Vatan va kelajak oldidagi burchimizga sobitlik millatning vakili o'laroq har birimizning yelkamizdagi yuk va nazorat nigohi. Ajdodlardan meros an'ana va qadriyatlarni avlodlarga talofotlarsiz yetkazish, sog'lom tafakkur, toza ruh – kechagi sharafimiz, bugungi talabimiz, ertangi qarzimizdir!

**A.XUDOYBERDIYEV,**

*ToshPTI Yoshlar bilan ishlash ma'naviyat va ma'rifat bo'limi boshlig'i*



# TALABALAR BILAN ISHLASHNING YANGI TIZIMI

Vazirlar Mahkamasining “Respublika oliy ta’lim muassasalarida talabalarni turar joy bilan qamrab olish darajasini oshirish chora-tadbirlari to’g’risida”gi qarori qabul qilindi.

Qarorga ko’ra, 2021-yil 1-sentabrda boshlab talabalar bilan ishlash bo’yicha “guruh murabbiyi” instituti bekor qilinib, 1–3-kurs talabalarining muammolarini bartaraf etishda yaqindan yordam ko’rsatuvchi tyutorlarni birlashtirish amaliyoti yo’lga qo’yildi. Har 120–150 nafar talabaga 1 ta shart birligi hisobida tyutor lavozimi kiritiladi hamda uning oylik maoshi “O’qituvchi-stajor” bazaviy lavozim maoshiga tenglashtirilishi, tyutorlar talabalarining ma’naviy va ijtimoiy holatini doimiy ravishda tahlil qilib borishi va ularning mavjud muammolarini bartaraf etishda yaqindan yordam berishi belgilangan edi.

Toshkent pediatriya tibbiyot institutida ham rektori B.T.Daminovning tegishli buyrug’iga asosan mamlakatimiz oliy ta’lim muassasalari ichida birinchilardan bo’lib universitetda talabalar bilan ishlashning yangi tizimi – tyutorlik faoliyatini yo’lga qo’yildi.

Xo’sh, mazkur faoliyatning mazmun-mohiyati, uning talabalar hayotidagi ahamiyati, foydali jihatlari qanday? Tyutorlarning qanday huquq va majburiyatlari bor?

Tyutor – bu talabalarga nafaqat bilim berish, balki, uning maqsadga erishishi uchun mustaqil ravishda harakat qilishga o’rgatadigan, o’z kamchiliklari ustida ishlashga, ajdodlar tajribasini amalda qo’llashga da’vat etadigan, ta’lim va tarbiya jarayonini birgalikda olib borishda bog’lovchi vazifasini o’taydigan yuksak kompetensiyaga ega bo’lgan shaxs hisoblanadi. Tyutor talabalarining shaxsiy rivojlanishini yo’laltiradi va ularning turli respublika hamda xalqaro tanlovlardagi munosib ishtiroki borasidagi faoliyatiga ko’maklashadi, shuningdek ularni kasbga yo’laltirish borasida qo’llab-quvvatlaydi. Shuningdek, talabalarining darsdan bo’sh vaqtlarini mazmunli tashkil etish, ularni insonparvarlik, adolat, mehnasevarlik, Vatanga muhabbat ruhida tarbiyalash, ularning ongida faol fuqarolik pozitsiyasini shakllan-



tirish, ijtimoiy-siyosiy, huquqiy va ma’naviy dunyoqarashini rivojlantirishda ko’makchi, yo’l ko’rsatuvchi vazifalarini bajarish ham bu yangi lavozim zimmasiga yuklatilgan. Tyutor o’z faoliyatida amaldagi qonun hujjatlari, institut ichki tartib va o’dbor-axloq qoidalari hamda ushbu nizomga rioya etadi.

Nizomda tyutorlarning asosiy maqsadi — ta’lim va tarbiya jarayonini samarali tashkil etishda universitet va talabalar o’rtasidagi munosabatlarni mustahkamlash, talabalarining universitet hayoti va ta’lim jarayoniga moslashishiga ko’maklashish, ularga uslubiy, ijtimoiy va psixologik yordam ko’rsatish va talabalarda tanlagan kasbga muhabbatni oshirishdir. Shu bilan birga ular yigit-qizlarning dars mashg’ulotlarini muntazam tahlil qilib boradi va sifatini oshiradi, ularning darsdan bo’sh vaqtlarini mazmunli o’tkazishini ta’minlaydi hamda ijtimoiy ahvoldan doimiy xabardor bo’lib turishi ko’rsatilgan.

Boshqa oliy ta’lim muassasalari singari Toshkent pediatriya tibbiyot institutida ham tyutorlar faoliyatiga umumiy rahbarlikni Yoshlar masalalari va ma’naviy-ma’rifiy ishlar bo’yicha prorektor amalga oshiradi.

Tyutorlar ma’naviy-ma’rifiy va axloqiy-tarbiya, o’quv va o’quv-uslubiy hamda ilm-fan, innovatsion va ilmiy-tadqiqot yo’nalishlarida o’z faoliyatini olib boradi.

Har bir tyutor o’ziga birlashtirilgan guruh talabalarini besh muhim tashabbus doirasida tashkil etilgan klub va to’garaklarga jalb etishi hamda ularning ijodiy qobiliyati va iste’dodini namoyon etishi uchun imkon yaratishi ko’zda tutilgan.

Talabalarining huquq va qonuniy manfaatlarini himoya qilish, ularning ta’lim olishi, ilm bilan shug’ullaniishi, yashashi va dam olishi uchun sharoitlar yaratishga ko’maklashish va bu boradagi yangiliklardan ta’lim muassasasi rahbariyatini xabardor qilib borishi ham tyutorlik fazifalariga kiradi. Talabalarining darslarni o’zlashtirish darajasini nazorat qilib boradi, ularning innovatsion ta’lim texnologiyalari va o’quv-uslubiy materiallar, axborot-resurslari bilan ta’minlanishi va ushbu manbalardan keng va unumli foydalanishi uchun zamin yaratadi.

Har bir tyutor o’ziga birlashtirilgan akademik guruhlarning darslarini, talaba davomlatini va dars sifatining monitoringini olib borish maqsadida kuzatish, talabalarga yuklatilgan majburiyatlarning bajarilishini talab qilish, TTJga joylashishlari uchun talabalarga e’lon berish va ular tomonidan tegishli hujjatlarni yig’ib taqdim etish hamda tashkil etiladigan komissiya yig’ilishida talabalarining ishtirokini ta’minlash, akademik ta’til berish masalasini hal qilishda ishtirok etish, ularni rag’batlantirish yoki jazolanish, turli stipendiyalarga tavsiya qilishda xulosa, tavsifnoma va fikrnoma berish huquqiga ega

Shuningdek, har bir tyutor talabalarining sha’ni va qadr-qimmatini, obro’sini hurmat qilish, ularning jismoniy, ruhiy va psixologik holatidan muntazam xabardor bo’lish, yoshlarning ota-onalari va o’zi bilan doimiy muloqot qilib borishga majburdir.

**S.A.BEGMANOV**  
**J.K.JO’RAQULOV**

# INSTITUTIMIZ OTMLARNING TOP 20 TALIGIDA!

Hayotimizning eng qiyin yoki tashvishli daqiqalarida yordam so‘rab o‘rganib qolgan odamlar toifasi mavjud. Gap tibbiyot mutaxassislariga haqida ketmoqda. Agar oddiy odam bironing hayotini saqlab qolsa, u qahramonga aylanadi – matbuot u haqida yozadi. Odamlar unga minnatdorchilik bildiradi. Shifokorlar va boshqa sog‘liqni saqlash xodimlari har kuni nechki kishining hayotini saqlab qolishadi. Ular uchun bu oddiy hol. Gap shundaki, tibbiyot xodimi bo‘lish, o‘z hayotini ushbu kasbga bag‘ishlash uchun nafaqat istak, fidoyilik, balki haqiqiy kasb ham bo‘lishi kerak. Shuning uchun ham mamlakatimizda so‘nggi yillarda barcha sohalarda juda ko‘p istohotlar olib borildi.

Chunonchi, O‘zbekiston Respublikasi Vazirlar Mahkamasi huzuridagi Ta‘lim sifatini nazorat qilish davlat inspeksiyasi 2021-yili yakuni bo‘yicha O‘zbekiston Respublikasi oliy ta‘lim muassasalari milliy reytingini e‘lon qildi. Tibbiyot sohasidagi yuksalishlarni Oliy ta‘lim muassasalari milliy reytingida Toshkent pediatriya tibbiyot institutining 11-o‘rinni egallagani misolida ham ko‘rishimiz mumkin. Bundan tashqari professor-o‘qituvchilarning ilmiy salohiyati respublika bo‘yicha TashPTI 3-o‘rinni egalladi.

Shu bilan birgalikda, mamlakatimizning tibbiyot sohasidagi oliy ta‘lim muassasalari reytingida 3-o‘rinni egalladi.

Reytingda Respublikamizdagi barcha oliy ta‘lim muassasalarining professor-o‘qituvchilari ilmiy faoliyati, o‘quv-metodik ishlar va o‘qitish sifati, talabalar bilimi va bitiruvchilar sifati, jismoniy tarbiya va sportni rivojlantirish yo‘nalishlari bo‘yicha faoliyatiga baho berildi.

Mukofotlar yuqori kasbiy mahorat, uzoq yillik tajriba, tanlagan kasbiga sadoqat uchun beriladi. Tibbiyotga oid asarlar, ixtisoslashtirilgan jurnallarda maqolalar nashr etish, yangi tibbiy nazariyalar yaratish va shunga o‘xshash ishlar nashr etilishi ham muhimdir.

Hayotda moliyaviy o‘shishga ta‘lim orqali erishish mumkin. Ta‘lim azaldan odamlarni o‘z huquqlari to‘g‘risida xabardor qilishning asosiy vositasi sifatida ishlatilgan.

Bugungi kunda ko‘pgina rivojlanmagan mamlakatlar ta‘limning jamiyatdagi ahamiyatiga e‘tibor bermaydilar, bu esa aksariyat davlatlarning sust rivojlanishiga olib keldi.

Yurtimizda olib borilayotgan keng ko‘lamli islohotlar natijasida tafakkuri teran har bir O‘zbekiston fuqarosi muvaffaqiyat muvaffaqi-

yatlarga olib kelishining jonli guvohi bo‘lib kelmoqda. Ta‘limni hech qachon e‘tibordan chetda qoldirib bo‘lmaydi, chunki ta‘lim har qanday jamiyatning yuragini tashkil qiladi. Har qanday jamiyatning muvaffaqiyati uchun yangi kashfiyotlarni yaratish, bu kashfiyotlarni bilish orqali insoniyat taqdirida tub burilishlar yasovchi yangi imkoniyatlarga erishish mumkin. Bugungi kunda jahon maydonidagi ko‘plab rivojlangan davlatlarning o‘shishi yoshlariga berilayotgan ta‘lim sifati bilan bog‘liq. Sifatli ma‘lumotga ega bo‘lgan kadrlar jamiyatning iqtisodiy, ijtimoiy va siyosiy o‘shishi va rivojlanishiga olib keladigan islohotlarni amalga oshirish orqali jamiyatni yaxshilashga qodir. Mamlakatimiz rahbari bu tendensiyalarni chuqur his qilgan holda na‘lim sohasiga siyosat darajasida e‘tibor qaratmoqda.

Ta‘lim orqaligina bizning ufqlarimiz kengayib boradi, kelajakda biz nafaqat mamlakatlarimiz hayotiga doir shaxslarga aylanamiz, balki butun dunyo millatlarining turmush tarziga, hayot farovonligiga daxldorlik tuyg‘usi bilan kelajakka mash‘al ko‘tarib boramiz.

Bugungi islohotlarga “labbay” deb javob berib, 2021-yili yakuni bo‘yicha O‘zbekiston Respublikasi Oliy ta‘lim muassasalari milliy reytingida Toshkent pediatriya tibbiyot instituti 11-o‘rinni egallagani institut jamoasini quvontirdi va shu bilan bir qatorda mas‘uliyat ham yukladi. Professor-o‘qituvchilarimizning ilmiy salohiyati respublika bo‘yicha 3-o‘rinni qayd etgani keyingi yillarga mo‘ljalni yuqori olishga shijoat bag‘ishlaydi.

**Abdulaziz NOSIROV**



# XALQARO TALABALAR ONLAYN OLIMPIADASI

Bugun dunyo xuddi sportdagi olimpiya o'yinlari kabi, fanning barcha tarmog'idagi olimpiya bellashuvlarida ham o'zining intellektual salohiyatini namayon qilmoqda. Olimpiadalar davomida ishtirokchilar murakkab nazariy va ko'p hollarda eksperimental muammolarni hal qilishadi. Qiziqish va ko'nikmalarni rivojlantirish, tabiiyki, musobaqa davomida juda kichik rol o'ynaydi va erkin fikrlashni boshlash imkonini beradi.

Fan olimpiadalari o'rtasida kuchli munosabatlar mavjud, biroq har bir musobaqaning ajoyib qirrasini bu maqsadga erishish uchun qulay muhit yaratadi. Maqsadli yosh guruhlaridagi farq o'quvchilarning o'rta ta'lim davomida qiziqishi va malakasini oshiradi. Pedagogik jihatdan musobaqalar mezonlariga muvofiq nafaqat alohida talabalar uchun, balki maktablarda turli darajali o'quvchilar uchun hamdir. Talabalar uchun musobaqalar, albatta, ularning sa'y-harakatlari va yutuqlari e'tirof etiladigan qiyinchiliklar va imkoniyatlarni taqdim etadi. Va erishilgan yutuqlar beradigan motivatsiya ham shunga yarasha.

Tafsilotlarga kirishdan oldin shuni ta'kidlash kerakki, har bir xalqaro olimpiada oz sonli o'quvchilarga mo'ljallangan va ularning individual ilmiy ko'rsatkichlariga e'tibor qarata-di. Shu o'rinda, 2021-yil 11-oktabr kuni Toshkent pediatriya tibbiyot institutida "Pediatriyaning oltin kuzi" deb nomlangan Xalqaro talabalar onlayn olimpiadasi bo'lib o'tdi.

Olimpiadada ishtirok etgan jamoalar "jamoatqadimoti", "test topshiriqlari", "vaziyatli masalalar", "Quiz intellektual o'yini" kabi bir-nechta bosqichlarda bilim va



imkoniyatlarini jamoadoshlari bilan hamjihatlikda sinovdan o'tkazdi.

Olimpiadada ishtirokchilarga taqdim etilgan savollar va vazifalar pediatriya sohasidagi muhim nazariy bilimlarni va tez tibbiy yordam ko'rsatishning amaliy ko'nikmalarini aks ettirdi. Quiz intellektual o'yinlar viktorinasi talabalarga tibbiyot tarixini chuqur o'rganishga va umumiy bilimni oshirishga imkoniyat yaratdi.

Keskin va murossasiz vaziyatlarda vazifalar, testlar va boshqa musobaqaning bajarilishini baholash tajribali professor-o'qituvchilardan iborat bo'lgan xalqaro hakamlar hay'atiga yuklatildi. Ustozlar jamoasi ham topshiriqlarning onlayn tarzda bajarilishi ustidan xolis nazorat olib bordi

Olimpiadada xorijiy davlatlar va O'zbekiston Respublikasidan jami 11 ta jamoa qatnashdi.

Toshkent Pediatriya tibbiyot institut mezbonlik qilgan xalqaro olimpiadada Rossiyaning Sankt-Peterburg davlat pediatriya tibbiyot universiteti, I.I.Mechnikov nomidagi Shimoliy-G'arbiy davlat tibbiyot universiteti, Volgograd davlat tibbiyot universiteti; Ukrainaning A.A.Bogomolets nomidagi Milliy tibbiyot universiteti hamda I.Ya.Gorbachevskiy nomidagi Ternopol milliy tibbiyot universiteti; Belarusiyaning Grodno davlat tibbiyot universiteti; Tojikistonning Abu Ali ibn Sino nomidagi Tojikiston davlat tibbiyot universiteti va Xatlon davlat tibbiyot universiteti; O'zbekistonning Buxoro davlat tibbiyot instituti, Qoraqalpoq tibbiyot instituti talabalari qatnashdi.

Keskin intellektual kurash, mu-nozaralarga boy ruhda o'tgan olimpiada natijalariga ko'ra 1-o'ringa A.A.Bogomolets nomidagi Milliy tibbiyot universiteti jamoasi, 2-o'ringa Toshkent Pediatriya tibbiyot instituti jamoasi, 3-o'ringa Grodno davlat tibbiyot universiteti jamoasi loyiq deb topildi.

Aslini olganda, bilimlar bahsida g'olib yoki mag'lub degan tushuncha bo'lmaydi. Bilimlar bahsining har bir ishtirokchisi g'olibdir. Tengdoshlari



bilan tanishuvga, ustozlardan yangi tajribalar almashishga, ilmga bo'lgan yangi motivatsiyalar olishga sabab bo'lgan "Pediatriyaning oltin kuzi" Xalqaro talabalar onlayn olimpiadasi ishtirokchilarida ham anglangan va anglanmagan yutuqlar bisyor. Bu yutuqlar yillar davomida o'z samarasini berib boraveradi.

Ilm-fan, texnika, san'at, umuman olganda, insonlarning turmush tarzi taraqqiy etgani sayin ehtiyojlarimizning talabi ham mukammal xizmatlarni taqozo etib bormoqda. Shu jumladan, sog'lom organizmning borliqqa mustahkam aloqalari uzun va totli umr bilan belgilanadi. Hayot ne'matlaridan to'laligicha bahramand bo'lishimiz uchun bizga ko'p narsalar kerak bo'ladi. Salomatligimiz bos-bonlari – shifokorlar. Tanamizning biron a'zosi bezovta qilganda ularga yukinamiz. Har tomonlama yetuk tibbiyot xodimi u yashayotgan davlat va xalqning boyligi.

Toshkent Pediatriya tibbiyot institutida o'tkazilgan "Pediatriyaning oltin kuzi" Xalqaro talabalar onlayn olimpiadasi bugungi talaba, ertangi salomatlik posbonlarini ilimning yangi sarhadlari tomon ilhomlantirdi. Ishonch bilan aytishimiz mumkinki, ushbu intellektlar bellashuvi talabalarning keyingi qadamlariga yanada ishonchini mustahkamlashga xizmat qiladi.

**Xasanxodja ABIDOV,**  
**ToshPTI rektorining yoshlar**  
**masalalari bo'yicha**  
**maslahatchisi – institut**  
**Yoshlar ittifoqi boshlang'ich**  
**tashkiloti yoshlar yetakchisi,**  
**O'zbekiston Respublikasi Oliy**  
**Majlisi Qonunchilik**  
**palatasi huzuridagi**  
**Yoshlar Parlamenti a'zosi**

## TIL – KO‘NGIL TARJIMONI

Til insoniyatning eng muhim munosabat shakli sanaladi. Har bir insonning o‘z millati, e‘tiqodi bo‘lganidek, o‘zining ona tili ham bo‘ladi. Inson xoh ispan, xoh turk, xoh o‘zbek bo‘lsin, Allohga o‘zining tili bilan murojaat qiladi, onasidan ona tilida alla eshitadi va mehrga yo‘g‘rilgan dil izhorlari ham o‘z tilida yangraydi. Shuning uchun ham til – ko‘ngilning tarjimonidir. Rus millati onasiga mehrini “Я тебя люблю” deb, ingliz xalqi “I love you” deb, oqko‘ngil o‘zbek elining musulmonlari esa “Sizni yaxshi ko‘raman, ona” deb so‘zga ko‘chirishadi. Zero, izhori mehr qaysi tilda jarang sochmasin, eng go‘zal va eng jozibali til sifatida qiymatini yo‘qotmaydi.

Til har bir millatning xarakterini ifodalab keladi, har kim o‘z tilini o‘zicha yaxshi ko‘radi, qadrlaydi, kelajagi uchun qayg‘uradi. Moziyga nazar solsak, millatning ziyoli qatlamini millat qiyofasi uchun kurashganda tilni ham ko‘z qorachig‘idek asraganiga guvoh bo‘lamiz. Davlat siyosatida tilning o‘rni doim muhim o‘rin tutib kelgan.

Mamlakatimizda mustaqillikning ilk yillaridan boshqa sohalar qatori o‘zbek tilining rivojiga ham katta e‘tibor qaratib kelinadi. Millat jonkuyarlari tilimizning istiqboli yo‘lida doim kamarbasta, izlanishda.

Kuni kecha Toshkent Pediatriya tibbiyot institutida shu munosabat

bilan O‘zbek tili va adabiyoti kafed-rasi tomonidan “Ona tili – millat ko‘zgu-si” mavzusida katta tadbir bo‘lib o‘tdi. Tadbirda Toshkent pediatriya tibbiyot institutining O‘zbek tili va adabiyoti kafed-rasi mudiri, filologiya fanlari nomzodi K.Sh.Turdiyeva, ma‘naviy-ma‘rifiy va xotin-qizlar ishlari bo‘yicha mas‘ul, katta o‘qituvchi M.R.Hamroqulova, o‘quv ishlari bo‘yicha mas‘ul N.U.Mehmonova, ilmiy ishlar bo‘yicha mas‘ul pedagogika fanlari nomzodi G.M.Ahmedova, kafedraning katta o‘qituvchilari: R.A.Berezovskaya, M.X.Mahkamov, Z.X.Sodiqova, G.K.Kuramboyeva hamda o‘qituvchilar Z.T.Rasulova, F.A.Akbarxo‘jayevalar ishtirok etdilar.

Tadbir avvalida ma‘naviy-ma‘rifiy ishlar bo‘yicha ma‘sul, katta o‘qituvchi M.R.Hamroqulova so‘zga chiqib, tadbir ishtirokchilarini bayram munosabati bilan tabrikladilar va o‘zbek tilining tarixi, bosib o‘tgan yo‘li haqida aniq dalillar asosida ma‘ruza qildilar. So‘ngra so‘zni O‘zbek tili va adabiyoti kafed-rasi mudiri, dotsent, bolalar shoirasi K.Sh.Turdiyevaga berdi. Ustoz so‘zga chiqib, avvalo barcha ustoz va talabalarni ona tili bayrami kuni bilan qutladilar va o‘zlarining ijod namunalaridan talaba, yoshlarga o‘qib eshittirdilar.

Tadbir davomida talabalar “Ona tili – millat ko‘zgu-si” mavzusida chi-

royli she‘rlar, g‘azallar o‘qish bilan birgalikda qo‘shiqlar ham kuylashdi. Bu tadbir davra ahliga manzur keldi, ishtirokchilar ona tili haqidagi bilimlarini boyitdi, mustahkamladi, ongidagi millat, vatan tushunchalarini yana-da tiniqlashtirib oldi. Ayniqsa, janubiy koreyalik talaba Gang Xuyun Kvonning chiqishi zaldagilarning davomli qarsaklariga sabab bo‘ldi. Bu koreyalik talaba institutda ikkinchi mutaxassislik bo‘yicha tahsil olayotgan bo‘lib, u sof o‘zbek tilida yig‘ilganlarni bayram bilan tabriklab, Abdulla Oripovning Ona tili haqidagi she‘rini yoddan o‘qib berdi va ustozlari, talabalarni hayratlantirdi.

Til – millatlararo sehrli ko‘prik hamdir. Til orqali biz o‘zga millatning mintaliteti, urf-odati, o‘tmi-shi, orzu-istaklari, dini, e‘tiqodi bilan tanishamiz. Ularning qalb kechinmalariga oshno bo‘lamiz. Koreyalik talaba qiz Gang Xuyun Kvon ham yodlagan she‘ri orqali o‘zbek millatiga mansub ayolning iztiroblari, e‘tiqodi, ibosi, armonlari bilan tanishgani o‘laroq o‘zbek ayolining obrazini ongida muhrlagani, o‘zining millatdoshlariga bu haqda gapirib berishi shubhasiz. Til inson qalbining tilmochi va u botiniy sarhadlarda mo‘jizalar yaratadi.

Toshkent Pediatriya tibbiyot institutida til bayramiga bag‘ishlab o‘tkazilgan “Ona tili – millat ko‘zgu-si” tadbiri a‘lo darajada bo‘lib o‘tdi va tadbir so‘ngida tashkilotchilarga tashakkur bildirildi. Talaba yoshlar tadbir davomida tilga muhabbatni yanada chuqurroq angladilar va his qildilar desak, mubolag‘a bo‘lmaydi. Vatani ertasiga o‘zini daxldor bilgan har bir talaba qalbidagi ona tilga nisbatan hurmat, ehtirom, mas‘ullik hissi yana bir bor mustahkamlandi.

**R.HAMROQULOVA,**  
yoshlar bilan ishlash bo‘yicha  
kafedra mas‘uli, katta o‘qituvchi.  
**M.AHMEDOVA**



## INSTITUT TTJGA SAYOHAT

Talaba soʻzining lugʻaviy maʼnosi toʻxtaladigan boʻlsak, arabcha: izlovchi, oʻrganuvchi; lotincha: studens – qunt bilan ishlovchi, shugʻullanuvchi degan maʼnolarni bildiradi.

Turkistonda islom dini yoyilgan VII-VIII asrlarda boshlangʻich maktabdan soʻng bilim olish bilan mashgʻul boʻlgan har bir kishi talaba hisoblangan. XXI asrda talaba maqomining sharaflari va masʼuliyati qamrovi bu atamaning dastlabki koʻrinishidan tubdan farq qiladi. Bugun talaba jamiyat taraqqiyotiga jiddiy taʼsir koʻrsatadigan, har bir mamlakat ilmiy-intellektual salohiyatining darajasini belgilab beruvchi, rivojlanish istiqbollari tikilayotgan sarmoyaga aylangan. Shu bois ham jahon maydonida oʻzining oʻrniga ega davlatlar taʼlimga katta eʼtibor qaratmoqda, yoshlarning puxta taʼlim olishi uchun bor imkoniyatini safarbar etishda jonbozlik koʻrsatayapti. Chunki mamlakat iqtisodi va madaniyatining yuksalishi, xalq xoʻjaligiga ilm-fan yutuqlarining joriy etilishi uchun oliy taʼlim muassasalarining talabalari chuqur nazariy bilim hamda amaliy koʻnikmalarga ega boʻlishlari lozim.

Oʻzbekiston mustaqillikka erishgach, mamlakatda talabalar miqdori sezilarli darajada ortdi. Bugungi kunda mamlakatimizda yoshlarning oliy taʼlimga qamrovini kengaytirish, ularga yana-da keng imkoniyatlar yaratish borasida salmoqli amaliy ishlar qilinmoqda. Xususan, talabalik baxtiga muayassar boʻlgan yoshlarimizga ham koʻrsatilayotgan eʼtibor va yaratilayotgan imkoniyatlar shular jumlasidandir. Chunki talaba mamlakatning ijtimoiy jihatdan eng faol, harakatchan, jonkuyar fuqarosi hisoblanadi.

Yotoqxonada talabalarining yashashi, oʻz ustida mustaqil ishlashi, dam olishi hamda sport, sanʼat va boshqa klublarda qatnashishi uchun sharoitlar yaratilgan boʻlib, zamonaviy jihozlangan, ozoda, yorugʻ ARMLarida barcha yoʻnalishlardagi kitoblarni topish mumkin. Talabalar turar joyining moddiy-texnik taʼminoti, uni kapital va joriy taʼmirlash, binodagi qattiq va yumshoq krovat, mebel, xona jihozlari (koʻrpa-toʻshak, yopinchiqilar), texnika vositalarini saqlash, taʼmirlash, hududni obodonlashtirish, tozaligini taʼminlash, kommunal-xoʻjalik xizmatlari (issiq va sovuq suv taʼminoti, kanalizatsiya, suv quvurlarini taʼmirlash) va boshqa



shart-sharoitlari institut tomonidan taʼminlanadi. Talabalar turar joylarida istiqomat qiluvchi talabalar Oʻzbekiston Respublikasi Ichki ishlar vazirligi tomonidan taʼsis etilgan qoidalar asosida vaqtincha roʻyxatga olinadi. Tarbiyaviy-madaniy, sport-sogʻlomlashtirish ishlari va talabalar turar joyida yashovchilarga maishiy xizmat koʻrsatishni tashkil etish borasidagi umumiy rahbarlik institut rektori zimmasiga yuklatilgan boʻlib, bu manzilga institut ishchi-xizmatchilari, begonalar, talabalarining oila aʼzolarini joylashtirish qatʼiyan man etilgan. Talabalar turar joylarida yashash uchun toʻlov miqdori institut Ilmiy Kengashi qarori bilan belgilanishi koʻrsatilgan.

Institut TTJdagi shart-sharoitlar, talabalarining kayfiyati bilan tanishish maqsadida kichkina sayohat uyushtirdik. Marhamat, soʻz talabalarining oʻzlariga.

– Men Polvonov Otabek Toshkent Pediatriya tibbiyot instituti 1-bosqich talabasiman va yotoqxonada turaman. Yotoqxonada sharoitlari uyimizdek yaxshi va qulay. Yotoqxonada tarbiyachilar bilan, xonadoshlarimiz bilan munosabatlarimiz koʻngildagidek. Ahilmiz. Oʻgʻil bolalar bilan aka-ukadekmiz, qizlar – opalarimiz, singillarimiz! Ularni himoya qilib yuramiz. Toshkent pediatriya tibbiyot instituti yotoqxonasi Toshkentdagi eng yaxshi yotoqxonaga!!!

Shu kayfiyatda ikkinchi talabaning eshigini qoqdik va u ham yotoqxonadagi imkoniyatlar, qulayliklar haqida oʻrtoqlashdi.

– Men Maxmasoatova Fayoza Toshkent Pediatriya tibbiyot instituti 3-kurs talabasiman. Yotoqxonada sharoiti zamonaviy va biz uchun barcha imkoniyatlar, kompyuter xonasidan to kutubxonagacha bor. Va yana yotoqxonamizda

master klasslar va bayram kunlari tadbirlar tashkillashtiriladi. Bularning bari vaqtimizdan unumli foydalanishga xizmat qiladi. Barcha sharoitlar oʻylaganimizdan aʼlo darajada, desam mubolagʻa boʻlmaydi. Tarbiyachilarimiz, xonadoshlarimiz bilan bir oiladek yashayapmiz.

Birinchi bosqich talabasi Yulduzning muxtasar gaplariga mikrafon tutdik.

– Men Ochilova Yulduz institutning 1-kurs talabasiman. Yotoqxonaga sentabrda kelgan boʻlsam, tarbiyachimiz bizni onamizdek kutib olgan. Yotoqxonada sharoiti ham, muhiti ham koʻngilga yoqadigan darajada chiroyli va qulay.

Oʻgʻil bolalar xonasining eshigini ham taqillatdik. Eshikni Quvonchbek ochdi.

– Men Roʻziyev Quvonchbek institutimiz yotoqxonasi haqida gapiradigan boʻlsam, yotoqxonamizning muhiti judayam yaxshi. Barcha sharoitlar bor va aʼlo darajada. Hamma narsa: oshxona jihozlaridan tortib, krovatlarimizgacha yangi. Sharoitidan tashqari yotoqxonaning muhiti ham chiroyli. Xuddi oilamizdagidek his qilamiz oʻzimizni.

Ilm-fanni oʻzlashtirish bilan mashgʻulliklari uchun talabalar jamiyatning intellektual ilgʻor qatlami sanaladi. Oʻzbekistonda talaba yoshlarning mamlakat hayotida faol ishtirok etishlarini taʼminlash, milliy istiqloq gʻoyasini toʻliq egallab olishlariga imkoniyat yaratish davlat siyosati darajasiga koʻtarilgan. Toshkent pediatriya tibbiyot instituti TTJdagi shart-sharoitlar bilan tanishib, yotoqxonada turgan talabalarga havasda qaytdim. Bu gʻamxoʻrliklardan esa qalbimizdagi yurt, millat taqdiriga daxldorlik hissi ikki karra oshadi.

**Shahnoza ABDUHOSHIMOVA**



Ijod bu – gulshan! Gulshan oralab gul termoq hammaga ham nasib etmaydi.

Har qanday sohaning o'ziga yarasha mashaqqati, qiyinchiligi bo'lgani kabi, ijod sohasida ham mashaqqat ila sidqildan mehnat bilan el orasida hurmat, e'tibor, ehtiromga sazovor bo'lish mumkin. Ijod naqadar go'zal!

Uni ta'riflashga til ojiz, go'yo.

Maktab kezlaridan she'riyatga qiziqishimni sezgan ustozlarim meni nihoyatda qo'llashdi. So'ng Guliston akademik litseyining "Tabiiy fanlar yo'nalishi (biologiya)ga" o'qishga kirdim. Bu dargohni baxt maskanim desam hych ham mubolag'a bo'lmaydi! Sababi, barcha yutuqlarim asosiy qismi shu dargohda ta'lim olganim bilan bog'liq! Tibbiyot oliygohi talabasi bo'lish istagida shu yo'nalishni tanladim. Litseyda o'qish davomida ijod olamini tark etsam kerak deb o'ylagan edim. Yo'q, aksincha bo'ldi. Ijodga qiziqishim kun sayin ortib borardi. Albatta, bu ustozlarimning dalda va meni kelajakka intilib yashashga da'vatlari tufayli bo'lgan. Ayniqsa, D.Qudratov, U.Begimqulov, M.Utayev, O'.Ro'ziyeva va X.Hudoyorov ustozlarimning o'rni beqiyos! Litseyda o'qigan paytlarimda she'rilarim respublika, viloyat, tuman, shahar va universitet gazetalarida birin-ketin chop etildi. Litseyini bitirib Toshkent pediatriya tibbiyot instituti talabasi bo'lishdek baxtga muyassar bo'ldim. Tibbiyot oliygohi talabasi bo'lgach, "Buyrak kasalliklari va uni davolash usullari" nomli ilmiy maqola yozdim va u Rossiyaning xalqaro jurnalida chop etildi. Shu orada "Nishona" to'garagi haqida eshitib qoldim va menda ijodni yanada yuksaltirish hissi paydo bo'ldi. Institutimizda taniqli bolalar shoirasi Kavsar opa Turdieva bilan yaqindan tanishishni istab, hozirda ular bilan birgalikda ijod olamida yanada yuksak marralarni zabt etishni maqsad etib qo'ydim! Juda ham samimiy, bir qarashda kishini ichki kechinmalarini anglab oladigan bu oqko'ngil shoira Kavsar opa Turdiyeva bilan ijod sohasida baland cho'qqilarni oshib o'tishimizga ishonaman! Kelajakda tibbiyot sohasini puxta egallab, ijod olamida o'ziga xos iz qoldirish bugungi kunda butunlay vujudimni va ruhiyatimni qamrab olgan oliy maqsad!

**O'ZBEKISTONIM!**

*To'rt fasl mujassam mening o'lkamda,  
Maysalar ochilar go'zal ko'klamda,  
Ko'rib, ko'zim quvnab, sevinch-la namda,  
Ta'rifing etmoqqa ojiz zabonim,  
Alloh nigoh etgan, O'zbekistonim!*

*Xushbo'y ifor sochar chaman gulzoring,  
Sharqirab oqadi, mo'jaz anhorning,  
Musaffo osmondir, sening ul yoring,  
Tabiatning go'zal, jannatmakonim,  
Alloh nigoh etgan O'zbekistonim!*

*Buyuk ajdodlardan merosim o'zing,  
Qalbm to'ridagi e'zozim o'zing,  
Yuksakga uchuvchi parvozim o'zing,  
Shukurlar aytamiz, so'lim diyorum,  
Alloh nigoh etgan O'zbekistonim!*

*Sen menga ham ona, ham ota makon,  
Har qarich yeringni, avaylab har on,  
Ravnaqing yo'lida bergayman men jon,  
Ey, aziz Vatanim, Ona tuprog'im,  
Alloh nigoh etgan O'zbekistonim!*

*O'ziga bek asli azaldan O'zbek!  
Mehmondo'st xalq bormi ushbu elimdek,  
Shu yurt farzandimiz barchamiz birdek,  
Dovrug'i dunyoga bo'lgan dostonim,  
Alloh nigoh etgan O'zbekistonim!*

**Sevinch Saidmurodova**

**O'zbekiston Respublikasi Sog'liqni saqlash vazirligi  
TOSHKENT PEDIATRIYA TIBBIYOT INSTITUTI**

**Professor-o'qituvchilar tarkibi bo'yicha quyidagi kafedralar lavozimlariga TANLOV e'lon qiladi:**

**KAFEDRA MUDIRLAR:** Ijtimoiy fanlar, pedagogika va psixologiya.

**PROFESSORLAR:** Farmakologiya; Ijtimoiy fanlar, pedagogika va psixologiya; Yuqumli kasalliklar.

**DOTSENTLAR:** Akusherlik va ginekologiya; Fakultet pediatriya; Jamoat salomatligi va sog'liqni saqlashni tashkil qilish va boshqarish; Farmakologiya; Ichki kasalliklar, nefrologiya va gemodializ; Gematologiya.


**KATTA O'QITUVCHILAR:** Pedagogika va psixologiya; Sud tibbiyoti, tibbiyot huquqi; Farmakologiya.

**O'QITUVCHILAR:** Fuqarolar muhofazasi.

**ASSISTENTLAR:** Tibbiy radiologiya; Asab kasalliklari va bolalar asab kasalliklari; Endokrinologiya va bolalar endokrinologiyasi; Patologik anatomiya; Oftalmologiya, bolalar oftalmologiyasi; Ichki kasalliklar, nefrologiya va gemodializ.

**Tanlov muddati – e'lon chiqqan kundan 1 oy. Manzilgoh: Bog'ishamol ko'chasi 223, ToshPTI.**

**Avtobuslar: 115, 19 ToshPTI bekati. 08.10.2021.**

 <p><b>TOSHKENT PEDIATRIYA TIBBIYOT INSTITUTI MEHNAT JAMOASI NASHRI</b> ОРГАН ТРУДОВОГО КОЛЛЕКТИВА ТАШКЕНТСКОГО ПЕДИАТРИЧЕСКОГО МЕДИЦИНСКОГО ИНСТИТУТА</p>	<p><b>Tahrir kengashi:</b> D.A.Asadov, A.V.Alimov, X.F.Haydarov, M.Ahmedova, K.N.Haitov, S.S.Gulyamov, D.T.Ashurova, A.Rahmatullayev, S.Nurxodjayev A.Valiyev, A.Nosirov, <b>Nashr uchun mas'ul:</b> Sh. Abduhoshimov</p>	<p><b>Bosh muharrir:</b> B.T.DAMINOV Tahrir hay'ati: (ishchi guruh) E.O.Tursunov, K.Sh.Turdiyeva <b>(Bosh muharrir o'rinbosari),</b> A.M.Mannonov, D.A.Ahmedova, H.Rasulov S.A.Begmonov, A.Nosirov, Z.Karimova, A.Xudayberdiyev</p>	<p>Gazeta Toshkent shahar matbuot va axborot boshqarmasida 29.12.2006-yil 02-0010-son bilan ro'yxatga olingan. Manzil: 700140, Toshkent-140, Bog'ishamol ko'chasi, 223 Gazeta institut hisobidan nashr etiladi va bepul tarqatiladi.</p>
---	---	---	--